

**MARIO EL CAPO COI AMISSI,  
“da Conselve alle Ande”**

“Varda che omo!” - La podarìa essere eà solita esclamassion de na tosa che, a quarant'anni, la sta ancora sognando el principe azurro, par via che da zovane la se ga fato becolàre on poco massa e gnanca in scondòn, dal merlo o dal passero solitario.

Invesse no! “Che Omo” xe on ordine cavalerisso desmentegà da la storia. Ordine voluto dal Barbarossa medesimo durante na crociata in Tera Santa. ...L'intrepido cavaliere, inscatolà come na sardina ne la so armatura, sderenà pae bote menà dai Mori, co l'ocio indormesà par le sventole cipà in te la crappa, vegnèa portà da esempio a tuto lo scudo crociato, (...Andreotti compreso). Allora el duce, cioè el Barbarossa in persona, lo ciapàva, lo fasèa portare in piassa d'armi davanti a tuto l'esercito e, al terso squilo de tromba, a gran vosse scandiva le paroe de Pilato, dopo ch'el gavea fato bàtare nostro Signore: - Ecce Homo – che tradotto in lengua vol dire: - Che Omo!-

El primo Che-Omo, pare sia sta on tale Gofredo di Coglione, ciamato poi Gofredo fi Buglione, par via de che l'assonansa poco cristiana. Sto tissio, poro can, corassà fin sora i denti, on dì come al solito, 'ndando duellare col feroce Saladino, par via de on colpo parà malamente e la corassa on poco rusine, el ga, zachete, perso le maschie tatate sul campo di battaglia. Però sto fatto ghe ga reso merito. Subito xr entrà a pieno titolo nell'ordine del Che-Omo anca se da ch'el dì, proprio, omo nol jera. ...Pare che, quando el cantava, el poaro Gofredo facesse la vosse fina, ....come el Mario Berto tenore col struca e gambe.

Passa un giorno passa l'altro, come dise eà storia, on dì l'imperatore, in tel momento che l'alsava la visiera al prode cavaliere distintose in combattimento, se vede davanti on viso da Madonna, na faccia mai vista, bea, tanto bea! On viso incornisà da un mucio de cavej, rossi, no, biondi, spassolà a la Botticelli, co do oci verde-mare. ...Mama che oci! ...Non convinto del tuto, o pure massa, l'imperatore ghe desliga la corassa e là, cari mii, xe spuntà do suche, do pomi da morsegare, do naranse, ma che digo, do meoni tipo Laura Antonelli nel film Malissia. Par tuta la piassa d'armi se ga sentìo on brusio, on ramenamento de ferro vecio, de spade, de scudi e tuti disèa: - che bonaaaa! -

Ma par via de eà concorensa, de tanto in tanto el caso se ripeteva, de ch'el tanto che, on “che-bonaaa” ancò, on “che-bonaaa” doman, l'ordine del Che-Omo xe subito 'ndà in desmentega. ...Eco, tuto par colpa del movimento feminista che no tièn par gnente in considerassìon le tatate dei omani.

Solo in tempi recenti xe sta riscoperto e valorizà sto nobile ordine.

...Do studiosi, miga tanto, de Gerusalemme Libarà, confrontando le reciproche ricerche, i ga dito che l'ordine no jera morto, che le storie de Armida e Clorinda le jera solo favole, che a quei tempi e done fasèa solo e done e no 'ndasèa a bastonare i Mori, isoma tuta na invensiòn del movimento feminista. Dunquese dovèa rispolverare le vece usanse, in modo ch'el mondo gavesse sempre pì esempi de omani veri, da simiotare! ...Braì! Ostrega, ...l'omo xe omo! No xe femena! ...VIVA LE DONNE, VIVA LE BELLE DONNE....!

Calcossa de sta scoperta ga da essare vegnù a recia a Berlusconi che, scavalcando e bariere deà storia, zachete, te ga fondà Forsa-Italia: on movimento di de ex-proletari e ex-sottoproletari in preda de crisi de astinensa poitica, comunque movimento che no reje el confronto col nobile e glorioso Che-Omo, ....pena pena, el vecio Balila!

Come ogni matina, anca el tredese de jenaro passà, i do studiosi (pì macà che mancà), se ga trovà soto eà Loza de Conselve col Gazetin in man. Manco farlo posta, tuti do i lesèva de quatro Conselvani, scaladori de na montagna de siemila.novesento-sessantametrie, fin che i alsava eà testa, come par vardare quanto alta che fusse sta montagna, i s'ha incontrà coi oci, e, gnanca fussei dacordo, i xe sbottà a dire: - mama, che omani! - I s'ha vardà ancora e subito i ga capìo ch'el mondo, fin che ghe jera de sta zente, nol jera finìo.

Sì el mondo garìa continuà a girare! Ghe jera ancora dei OMANI e che omani! Decisi a rischiare tacuìn e vita par andar vedare l'ultimo sasso messo dal Creatore in sima a na montagna de siemilanovesentosessantametri. Omani de cheà taca, minimo minimo, sarìa sta da presentare come ministri del futuro governo Berlusconi. ...Parchè sti omani ga la solussion a tuti i problemi. Spesa pubblica, Bilancio, Strade, Ferrovie, Sanità, ecc, ...quisquiglie, pinzellacchere, ...bastarìa metare a carità Berlusconi!

...Forsa Italia! Forsa mi!

Forsa ti! Eviva el vin!

Abasso l'oste vilanasso  
che mette acqua nel tinasso.

Viva Mario, Paolo e Piero  
e de Lorenzo l'ocio fiero!

L'Aconcagua se bevemo  
el Kapadue se magnemo  
quelo fato de zucoto  
con on litro de recioto.....

Ve go dito in rima chi che xe sti omani che par on dè i xe sta a l'onor de la cronaca. Desso ve i spiego anca in prosa:

Mario Silvoni – sempre queo, ....queo de le braghe..., tanto omo da essare de diritto el capo spedission. Ancora na olta, lo se poe capire ben da le cronache de chei dè in Argentina, el ga messo in rilievo eà so dote pì bea: complicare e robe fassii e rendere fassii quee complicà. ...Tuto par via del tremito che ghe ciapa in gola nei momenti de agitassion o de confusion, tanto che i so amissi, senza capire na parola, se no i xe ebeti, i se da la mossa, intuendo dal balbettio che la situassion se fa on fiatin pericolosa.

Mejo cussì, parchè se sa, ..."l'intuire xe diverso dal capire". ...Capire in te chei momenti non ne vale la pena, parchè e paroe de Mario da-da-darìa co-co-come ri-ri-risultato na-na-na gran confusion – on bel casìn!- "oh Si-Si-Signore ghe voe ta-tanto ca-capire?"

Paolo Molon – xa el cognome ne dise ch'el xe na roba granda. Se ga messo de so spontanea volontà a disposission come smedego deà spedission, par la so esperienza al quarto piano in ospedae. Tanto, poche rodee a posto là, tante rodee fora posto

qua, ....se va dove ghe xe necessità. Manicomio xe scritto par fora e proprio fora ghe jera tre tipi pericolosi, che lu conossiva ben. I ghe parea tipi normai, pari de fameja. Cussì dopo ‘verli scoltà, el se ga dito: - mejo 'ndarghe drio, che no capita calcossa, che dopo el governo no me ritegna responsabie.- Che coscienza! ...Ostrega, che omo sto Paolo!

Piero Badan – sto qua xe on personajo proprio forte! Penseve ch'el se ga scoperto scaladore de montagne in calar de luna. Fin a quarant'anni i monti lu i vardava solo in cartolina. E “tere gobe”, come ciama lu le montagne, jera solo on mucio de fango seco, vansà in te ch'el famoso sabo de sera, dal Creatore, dopo aver impastà el mondo. Insoma, lu conossiva el mestiere, on mucio de betonata seca!

Sto individuo, oltre che par la zazzera, ga anca ‘no spicato senso pae lingue. Xà sperimetà in Africa. In Argentina el faxea l'interprete e par fortuna i lo ga capìo (o intuio?). Penseve: el xe sta bon a fermare tuto el corpo medico de l'ospedae de Mendoza che gavea deciso de drissare i oci a Lorenzo. ....Se l'assava fare i ne garia cambià l'omo e la Storia! Che disgrassia! Invesse Piero, capio l'equivoco, par salvar l'amigo da pì nefaste conseguense, ga dito e ga spiegà ai dotori ch'el toso gavea i oci invirgoeà, parchè cussì lo gavea fato so mare. ...Che queo jera on dono de natura, ...no la conseguensa del ramenoto! Che per favore, pa’ drissarghe i oci, no i rovinasse eà carateristica peculiare de l’homo sapiens!

Lorenzo Molon – on mito! Grando come el so nome: Molon e basta! ‘Na gloria par sempre! ...On toso che xa conossemo par via de la teoria del “nare de qua e nare de là”. Pare parò, che neà spedission Argentina no la gabia funsionà. Pare, par via de forti campi magnetici, on fenomeno raro che ga el potere de roersare e strade e, al verificarse del fenomeno, lù, non essendo preparà, el xe cascà! ...Ma sta qua xe nantra storia, che nessun conosse, solo ‘na madoneta che lu se portava drio, dentro el zaino, regalo de don Ezio. Lorenzo: che omo!